

Pilipaai

Pilipaai Mwaalyaraavina Poli Pikariyikwia Yidavakesi.

1 ¹Pilipaai mwaalyaihi nya'mweihi,
Kiraazitiyai Jizaazari wilamwaaihasa'neihi Gotiyare tewaanyaihi,
Polinyiji Timotilyi sainaai Kiraazitiyai Jizaazare yaasiwa'wawinyainaai
pikariyikwia da' yihyasivanaabiholyainaalyi. A'mweihirina,
kusilaanyaviyaihire maremwaalyaihirinaji widaayaihirinaji saihiri
yihyasivanaabiholyainaalyi. ²Nemire Gotiyai Nenimaangelyi Naanga
Jizaazai Kiraazitiyalyi yanga gaimwangebwi yihika! Sarimire simunyavi
kave kwaamu'nanya' yihwakika!

Poli Gotiyari “Su! Su!” widake'nesi.

³Sariminyina yawi'dinyagaa' gazagaasagaa' nimore Gotiyari “Su!
Su!” widadinyainyi. ⁴Yuya widadinya sangi, sariminyi gaimwanga
yihya'ne widadinyangi yilaaya yadi Naangeri yidaangadinyainyi.
⁵Sare' dare'nanyi. Sarimi yagaala tewaanya' yamaaresagaa'daasi
dahaa'nanneihini nimiji yagaala sa' a'mwera maarya'na mena
nye'mwannayivanigasa'nanyi. ⁶Nimi mena dara yawi'manige.
Gotiyai sariminyi wawinya nawi'nya' mena yihivani'. Sai wawinya'
kuna kuna yiwawoji wawinya sa' yi'mwannyina yade Yirika yune
Kiraazitiya Jizaazaregaa'na. ⁷Yo, sarimi yuyaihirina simunya sara
yibwakinna yivanige daza' yida'nanyasi. Sa' dare'na. Yuyagaa'
nimore simunyaburi sariminyi yihilimwaga'dinyainyi. Yi sariminyina
tewaanya nyivu'nivanike'nanyi. Nabaai yuyaihi yanga gaimwanga
naangebwi nimiji ye'mwannamaa'maniga'. Yi yagaala tewaanya'
a'mwera maarya'na yanga sabwi nye'mwannayivanigasa'nanyi.
Nimi kalavuzavi mwaaidinyagaasi yagaala tewaanya sa' nebulya'na
warya'ne' jalikurakegaasi a'mweraavire simunyangi yagaala tewaanya
sa' diraginya yivaimwagehaasi yuya sagaa' sara yadivisaihilyi. ⁸Sare'

darevidaa'nyinyi. Kiraazitiyai Jizaazari sariminyina tewaanaanga wivu'nivanikabaai sahwari yuyaihirina tewaanaanga nyivu'nivanike' Gotiyai nayaa jalikurakanneinyi. Sariminyawinna yihwanganaawide'na yihithiwa.

⁹“Sarimire tewaanya yihivu'nyabwi naanga naanga kuna yima'nana! Nebulya'na jawiranganyidesi yuya simunya tewaanya naangeji naanga kuna yihimaremwaalana!” dena nimi Naangeri sara yidaangadinyainyi. ¹⁰Nabaai gevwi gevwi nayaa yawiranganya'neihiri yihimaremwaaladengi. “Kiraazitiyarine Yirikeriki sarimi nawi'nya tewaanyaihi yiwetawakya maayaihi dimwaalyideihilyira,” dena Naangeri widadinyainyi. ¹¹Yi Jizaazai Kiraazitiyari yisi' yisila nawi'nya yi'nadevaabi' yida'maraangebwi sariminyi yunebanna kuna yihwaradevulyi. Yi sasare sabwi yadaapiji Gotiyarine yaya' munyaba makilya'naji “Byaannakei!” dadaa Gotiyari yilaaya wimarya'naji sara widadinya'nanyi.

**Poli kalavuzangevi mwaalake' daza' yagaala
tewaanyavi gaimwanga yake'nesi.**

¹²Nya'mweihi, sarimi yawiramaasavina dara nyivu'nivani'. Niminyi taanga nyima'nade datha kiri' yagaala tewaanya' yawiranganya'na marihiri. Aawa. A'mwe kwaala kwalaalyara yagaala sa' kadika kuna wi'nivanigasasi. ¹³Yi sare'na dame maredaata yuyara Sizaare angevina dame daa'divisaraji a'mwe pwara kwaraji sara “Kiraazitiyarina widake'na kalavuzavi mwaaidelyi,” niminyina mena nayaa yawi'divisare. ¹⁴Nabaai kalavuzavi mwaaideri Naangei niminyi nayaa nyigaimwade' Naangerine neya'mwe kwalaalyara tinna wangadivisa'na kuminyi wigaimwange'na yawi'divi' kumire simunya' diraginya maa'divisa'na lika yabwi yagalya'ma'divi' Gotiyare yagaalya' wijiwaakya'na diraginna yadivisare.

¹⁵Dare' nebulyasi. Pwara nimore wawinya Gotiyarine'na tiganaarya yadivi' niminyina “Sai kalavuzavina nayaa mujadei. Sahwari wawilavaana!” yawi'divita dazavi Kiraazitiyarine yagaalya' wijiwaakadivisasi. Kiri' pwara niminyina simunya nawi'nya kininnakera wijiwaakina. ¹⁶A'mwe dazara niminyina wivu'nivanike'naji yagaala tewaanya' nebulya'na warya'ne wawinya naange' nyijaavakevina yawi'divisa'naji sara wijiwaakivanigasare. ¹⁷Kiri' pwara sara “Polimina neminne yaya naangenna yaana!” deva Kiraazitiyarina wijiwaakina. Sahwara simunya tewaanya kininnakera yawita girikita'nanya maayara sara wijiwaakadivisara mika! Aawa. Nimore kalavuziwawinyavi “Taanginya piniji yibwa'mwagaana!” yawi'divi' sara wijiwaakadivisa'nanyi. ¹⁸Kiri' maajimunya myawiriwana! Baa'nana! Yuya saburaavi, niminyina yawita kayaa'nanyanginaji niminyina yawita tewaanyanginaji Kiraazitiyarina wijiwaakadivisare. Dazavi nimi yilaaya yivanige. Yo, nimi yilaaya naanga kuna yideinyi.

¹⁹Sare' darevidaa'nyinyi. Nimi mena yawi'manige. Niminyi gaimwange'na sarimi Naangeri widadivisaviji Jizaazai Kiraazitiyare Kuryai niminyi diraginya nyivaimwadeviji dahaa' nyima'niwaka daza sa kayaaka nyigalade mi'. Naangei nyivadaihasamaadeinyi. ²⁰Yi "Yima'nadenna tilijaaya baihanarima!" yawi'di dazanna yemwaaimanige. Dare' yemwaaimanigeinyi. Nimi wagila maalika aane pimili' kimili' maarideinyi mi'. Aawa. Yuyagaa' sara yadinyabaaibi' dahaa' yuya nimire kilaakejiki yidevi Kiraazitiyarine yaya' makilya'neinyi diraginna daa'di nayaa jalikurakima! "Nimi gaala mwaaimujainyi sara yideinyi dingaka? Nimi baimuja kwainyi sara yideinyi dingaka?" dena nayaa yivanige.

²¹Sare' darevidaa'nyinyi. Nimi gaala mwaala'mujiyainyi Kiraazitiyalysi ye'mwannamwaaihe. Nabaai nimi bala'mujiyainyi Kiraazitiyarine yaya' diraginna makilideinyi. Yi sa' nimire mwaalyabwi wawilavade niminyine'nanyi. ²²Nabaai nimire kilaakejiki kuna mwaaimujainyi Kiraazitiyarine'na tewaanya nawi'nyaanga yisilyabita yideinyi. Kiri' nimi be tutariki midinideinyaka? "Balima!" yawirideinyi dingaka? "Mwaalima!" yawirideinyi dingaka? Nimi myawiriwa. ²³Yi savina nimi simunya piriwaa'i yawi'manige. Kwaaka davaki yagalya'ma'mujainyi Kiraazitiyalysi ye'mwannamwaaimuja'. Darevinyi. Sa' tewaanya naangesi. ²⁴Kiri' sara yiwijainyi gara yihigaimwagideinyaka! Sare' kilaakejiki sariminyine'na yihimudaasivanike'na kuna mwaalima! ²⁵Sare' diraginna yawi'manigevidaa'nyi dara yawiramaa'manige. Nimi kuna mwaaidi sarimiji wawinya yihye'mwannayideinyi. Naangeri diraginna limwangebwi naanga yima'nya'naji diraginaanga limwadivi' yilaaya yihya'naji yihigaimwagide'nanyi. ²⁶Nimi sariminyawinna ayina mwaalidevi sarimi niminyina yilaaya yadivi' "Neminyawi mena mwaalike'na Kiraazitiyai Jizaazarine yaya' munyaba naanna makilaana!" dizide' yihye'mwannamwaaide'nanyi.

Yagaala tewaanya' limwadivisara yabwinesii.

²⁷Yuya yima'nadengi sarimi "Kiraazitiyare yagaala tewaanyavi limwadaanyainera," dadivi' Gotiyarera yipinebwi nayaa yida'maraangebwiina jila! Sarevi nimi yihwanganaawideinyi dingaka? Sariminyi kuna yibwa'nideinyi dingaka? Yi sareinyi sariminyina kadika sara wi'nya'ne'na sara jila! Dara wi'nya'neinyi nyivu'nivani! Sahwara avaaizimunya'na daa'divi' yagaala tewaanya' limwaga'manigasarera. Yi yuyara, yagaala tewaanya'na kwiya'mwera diraginna limwange'na dihaa'bwata yimanigasarera. Malyavi ye'mwannadivitabaaibi' yuyara sara yivanigasarera. ²⁸Sahwaraavina taanga wijaavadivisara aane pirivi kirivi sahwaraavi lika wiri'gaimanigasara mika! Sahwara saraavina lika myivanigasara. Nabaai sarimi lika mi yipija' daza' yikamaangeraavi yibwaridaakwia dara yadesi. Sahwara kayaaka

yinipi'dere. Nabaai sariminyi dara yihibwaridaakuvani!. Gotiyai sarimi tewaanya mwaalya'na yihivadaihasamaadelyi. Yi Gotiyai sahwaraviji sariminyiji sara yihyadelyi. ²⁹Sare! dare'nanyi. Sariminyina Kiraazitiyare wawinya ya'ne'na Gotiyai tewaanyabwi yihizaavanikelyi. Kiraazitiyari diraginna limwagya'ne gavebwina yihizaavada mi!. Aawa. Gaminyi daanga maarya'ne kibulyi yihizaavanikelyi. Sarevidaa'nyi yagaala tewaanya' kuna dilimwagarila! ³⁰Yi sinnawi nimi Gotiyarine mala bwa'daaziya' sarimi tinna wangane!. Nabaai dahaakigaa' nimi mala kuna bwa'manige'na sarimi kadika wi'nivanigasasi. Mala yune gave savina avaaainanyavina sarimi bwa'nivanigasaihilyi.

Pilipai mwaalyara avaaizimunya'na yawisa'na Poli yilaaya yake'nesi.

2 ¹Kiraazitiyai nemire simunya' neyivaimwadei daakaji, Neminyina gamire wivu'nyabwi nemire munyi' nayaa newa'dewwi daakaji, Kurya Tewaanyalyi ye'mwannamwaihoina daakaji, Nemijiya pwaraavina kale neyada tewaanaanga nevu'nadeina daakaji, ²yi sarevidaa'nyi nimore yilaaya naangebwi yuna naanga jila! Yi avaaizimunya'na jawiryideviji wivu'nya avaala saburi jideviji kurya avaala gave pibwina dilimwagaryideviji gave pibwi jawiryideviji yuneba yilaaya dinyigalyila! ³Sarimi yune sariminyine'na simunya yawi'divi' aane pimili' kimili' mipinera! Sarinnya yaya munyaba makilya'na aane pibwi kibwi mipinera! Aawa. A'mwe pwaraavi dalaangewi mwaaidivi' "Sahwara neminyi nevilapika!" jawirila! ⁴Gazaigizaigi ginnya yunenna mamaremwaaidinnera! Aawa. Gazaigizaigi pwaraavire sa kiningiji dimaremwaala!

⁵Kiraazitiyai Jizaazari simunya pibwi wiwarakabaaibi' simunya avaaainanya dilimwagarila! Darebulyi. ⁶Sahwai Gotiya nebulyai mwaalaka kiri! Sigunyavi Gotiyalyi avaaaina mwaalya sabwina kuna limwange'na yawirakai mi!. ⁷Aawa. Sai sasare sabwi yagalya'ma'na yaka kunei yima'naka a'mwe yaasiwa'wawinyaraavirebwibi' maarina yakei yi a'mwei yima'nyina. A'mwei a'mweraavine avaaainanyai yima'nyina yada ⁸gami sari kwaakewi walamarakinyina. Sara yada Gotiyari yagaalya midinakelyi. Nabaai kuna sara yada yune gami balakegaa'na. Yo, yune yisaviri kamaratamarimwe' wagilyavine yisavi balakegaa'na. Yi sarevi kwaakewi walamarakinakelyi. ⁹Sare'na Gotiyai gaminyine yaya' munya ke'ba makilaka sahwaru munya ke'beva mwaaihakelyi. Sara yaka Gotiyai yaya nawi'nya' yaya pini wawilavike' wijaavakelyi. ¹⁰"Sigunyavi mwaaihata yuyaraji Kwaakevakiyaraji kwaakevi amwihilyaraji Jizaazarine yaya sa' dadivi' gaminyi kwadaai gibika!" daka yaya nawi'nya sa' wijaavake'nanyi. ¹¹Nabaai a'mwe yuyara kunnya maangisi dara jalikurakipi'de'nanyi "Jizaazai Kiraazitiyai sai Naangelyira." Sare'na "Gotiyai byaannakela!" dadivi' Nimwarine yaya' munyaba makibi'de'nanyi.

“Gotiyai yihivadaihasamaarakeihi yipinengi jila!” dake'nesi.

¹²Nimire nyivu'nivanikeihi, Kiraazitiyai Gotiyari sara midida sariminyine'na ke'ba'nanya' yakabaaibi' “Gotiyai sara nevadaihasamaarakei daakaji,” yipi'dengi jila! Yi sinnawi yuyagaa' Gotiyari midinesaihilyi. Sarimiji yihye'mwannemwaaidinya yune sagaa'na midinetabaaibi'na myihizivanige. Aawa. Dahaa' menyawi nimi mwaaida'mwi sarimi naanga kuna dimidinyila! Gotiyarina dara yawi'divi' “Sahwai naangaangei mena ke'ba mwaalikelyi,” lika nayaa yiwainigulina yadivi' dahaakigaa' yihivadaihasamaarakeihi sareihi sara yipinengi jila! ¹³Sare' darevidaa'nyinyi. Gotiyai sariminyi kusawi yihyadelyi. Yi sarimire simunyaburi gami sai yihidikaa'bwa'delyi. Nabaai gami sare simunya nawi'nya kininnakebwina wivu'nadevaaibisanna ya'neihiri yihimwaaihadelyi.

¹⁴Yuya yipija sa sarimi kinimyagaalyaji maiyagaalyaji nayaa makwasakina yadivi' jila! ¹⁵“Yiwetawakya maayaina mwalaana! Nemire simunyavi kayaa'nanyabwi mwaranna!” dapiji sara jila! Yi a'mwe yida'maraangebwi yagalya'ma'divi' kumire simunya naadiya' yinikera kayaa'nanyabwi yadivisaraavi tinnyaba mwaalyaihi sarimi Gotiyare kaimiraayaihi kayaa'nanya maayaihi sara jila! ¹⁶Sarimi yagaala gaalyabwi kininnake' maguzaavadivi' sahwaraavi tewaanya sa' wijiwaakadivisavi sarimi a'mwe Kwaaka jihinya davakiyaraayaba baakeihi livamwaaidivisaihilyi. Sara yipijaihirina Yirika Kiraazitiyaregaa' yilaaya yideinyi. Nimire yaya' makibi'de'nanyi. Dara yawirideinyi. Kuminyawi nimi kaanyave'na gazare myadi nimire diraginya' yaasiwa' miraagiki'na myeneinyi. ¹⁷Aawa. Sarimire Kiraazitiyari diraginna limwangebwi yi sabwi Gotiyari wabatirinya yiravayihu'divitabaaibisabulyi. Nabaai nimi baimuja' nimire tawe' dimapija' waainiya'bi' Naangerina wabatirinya yiravayihu'divisavi dima'divitabaaibi' yi sarevi yilaaya naanga yide'nanyi. Yo, nimi sarimiji yilaaya yihye'mwannayideinyi. ¹⁸Sasare savi sarimi yilaaya avaaina jila! Yo, nimiji yilaaya dinye'mwannayila!

¹⁹Nabaai Naanga Jizaazai kyawiroji maalikegaa' sariminyawinna Timotiri maryasaabidelyi. Sai ayina kabozu “Sariminyinenna yawiramaara'muji nimire simunya' yilaaya naanga yima!” da'muji maryasaabidelyi. ²⁰Sare' darevidaa'nyinyira. A'mwe pwai kwai, Timoti nimiji avaaizimunya'na yadeibisai kuneinyi. Sariminyi gaimwange'na nebulya'na maremwaaalya'ne pwai kuneinyi. Sarevi Timotiri dahilakiwelyi. ²¹Sare' darevidaa'nyinyi. A'mwe yuya pwara kunnya yune yawisannenna biramaa'divisare. Kiraazitiyai Jizaazarena maremwaaidivitara mi'. ²²Nabaai sarimi Timotirina simunyabwi mena yawi'divitabaaibi' sai a'mwe tewaanyalyi. Kaimiraayai ganimaangeri

gaimwadevaabi' yagaala tewaanyavina nimiji ye'mwannawidaayolyalyi. Sarevi sahvari dahilakiwelyi. ²³Sarevidaa'nyi niminyi nyima'nadevi mena yawira'muji sahvari yime'nya'bi' sara maryasaabidelyi. ²⁴Nabaai Naangeri nimi diraginna dara yawi'mwa. Maalikegaa' nimi kwainyiji sariminyawinna bideinyi.

²⁵Nimi diraginna yawi'manige. A'mwe Epapirothaaitazari sariminyawinna yime'nya'bi' ayina maryasaabima! Sai nemire neya'mwelyi. Niminyi avaiwawinyalyi. Mala dazavina nimiji nyigaidaa'delyi. Sarimi kigaa' sahvari niminyawinna nyimaryasaabesai sarei nyimudaasakenna niminyi nyigaimwagakelyi. ²⁶Gamire simunya' sariminyi wanganya'na wabahilaaka wiadevidaa'nyi sarimi "Nalaaya kininnakelyira," kadika wi'niwa'daasa'na sawai "Yawita kwalaalya nyipidika!" kadiwa' sariminyina taanginya wiwa'mani'. ²⁷Yi nebulyasi. Kigaa' nalaaya waraka kibawa mena kabaladikelyi. Kiri' sawarina Gotiyai kale wiaka tewaanya yavada'galakelyi. Nabaai Gotiyai kale yune gave sarina yakai mi'. Aawa. Sai nimi kwainyinaji kale wiakelyi. Nimi gamire nalaaya'na kale nyakeinyi sawai balaji kwaji taanginya naange' niminyi yilasa'na kanyadika! Sarevidaa'nyi sarebwi "Aala!" yawiraka gaminyi yivainimwaaihakelyi. ²⁸Sarevidaa'nyi sari kamaryaasa'muji sarimi tinna ayina kwanganapiji "Yilaaya jila! Nabaai sai sariminyina simunya kwalaalya yawi'manike' mi'na yima'nade'na nimore taanginya kirisu myima'nanna!" da'muji niminyi tewaanya diraginna nyivu'niwa'. ²⁹Sarevidaa'nyi kabi'mavoji Naangeri limwaga'divisara kunnya limwaga'divita pwaraavi maapinebaabi' sarimi yilaaya naanga yadivi' sawari nayaa dimaaryila! A'mwe sasare saibisaraavine yaya' munyaba dimakilyila! Kuna sara jila! ³⁰Kibawa mena kabaladikei Kiraazitiyare wawinyavi sai gaala kuna mwaalya'na yawi'dei mi'. Aawa. Sai wawinya' sarimi yiniga manyigaimwagi yipine'na yawi'da "Polimi wigainiwakevi yunebanna yi'mwannima!" yawi'da nyigaimwagakelyi. Sarevidaa'nyi sawari nayaa dimaaryila!

3 ¹Nya'mweihi, yi nabaai Naangeri wilamwaaihasa'na yilaaya naanga jila! Sariminyina nimi yagaala da' pikarya ayina yidasa'na nimore simunyavi "Aala!" majiwa. Taanga manyivani! Sariminyi gaimwanga'nesi.

**A'mwei Kiraazitiyarina diraginna limwagazai
sai a'mwe yida'maraangelyi.**

²Kavijilikerabisaraavina mala nayaa jiwannyila! Sawara wawinya kayaa'na yadivisaraavina mala nayaa jiwannyila! Sawara sarimire kilaakejikaavi gurya kayaa'na daya'neraavina (Juyaraavina) mala nayaa jiwannyila! ³Sare' darevidaa'nyinyira. Gotiyai neminyina neyawidelyi nemire kilaaka gurya madayinaavina " 'Kilaakeji'

niminyina gurya nebwina da'nikerera,' yawi'manige.” Sareinaavi Gotiyare Kuryai nemwaaihake'na Gotiyari yilaaya nebulya'na yadaanyi. Sareinaavina Kiraazitiyai Jizaazai yune yake'na gaminyine yaya' munyaba makidaanyi. Nemi kilaakejiki yiniga negaimwagya'ne sanna diraginna malimwagivanigo. Yi nemire mwaalyabwina myawiri, nemire kilaakejikina myawiri yadaa Gotiyai “Yida'maraangeihilyi,” nedadeina yune Kiraazitiyarina limwamanigoinera.

⁴Sare kiri' “Nimi yima!” diwiji kwaji kilaakejikine saburana diraginna limwadinya sa' niminyi yiniga nyigaimwagya'ne'na niminne tusa' kininnakeinyi. A'mwe pwara kwara kilaakejikine saburana diraginna limwadivi' “Sanna niminyi yiniga nyigaimwaganneinyi,” yawipijaraavi, yi kilaakejikine sabwina nimi sahwaravi wawila'manigeinyi. ⁵Yi dareinyi. Yirika ati ata puridaa'nyi daryaai dariki nimire kilaakeji' gurya nyidavesainyi. Nimi a'mwe Yizireliyainyi. Yi nimi Bejaminimire yisavaakidaasainyi. Nimi Yiviruyainyi. Nabaai nimire Ne sinnawinyara yuya sara Yiviruyarera. Nimi Yiviruyaraavidaa'nyi avaaitaweji'nyi. Ne Mozizare Kiwinyavina Periziyara nayaa maremwaaidivitaabaibi' Periziyainyi nayaa midineinyi. ⁶“Juyainaavirebwi Gotiyarebulyi,” yawi'di diraginna yina ye. Yi sareinyi “Gotiyai sara yawi'delyi,” dadi Naangere kusilaanyaraavi kayaa'na yeinyi. Nabaai a'mwera niminyi nyawibwapiji kwaji Kiwinyabwi midinya'na, sare' nimi yida'maraangeinyira. ⁷Kiri' yuya sa kigaa' “Sa niminne sa naangengira,” yawire yuya daza daha' dara yawi'mwa. Sa kune yaasiwa'nanyangi. Yi neminyina yune Kiraazitiyai yake' sa' naangaanga gavesira.

⁸Yune Juyaraavire gave sanne'na majivanige. Aawa. Nabaai nimi yuya piningina “Sa yune yaasiwa'nanyangi,” yawi'manigeinyi. Nimi Kiraazitiyai Jizaazai nimire Naangeri yawirangadi, yawita sa'na nimi yibwakidi sa yune naangesira. Sahwarina yuya sa mena yagalya'maveinyi. Nimi yuya sanna yawi'manige' mena yaayewi livarannikebisangi. “Nimi yune Kiraazitiyari maa'di Nawi'nyinaangereinyi yima'nima!” dadi sara ye. ⁹Sahwari nimi wilamwaalya'neinyi sara yeinyi. Yi nimi Mozizare Kiwinya dinikebwi midine'na Gotiyai “Yida'maraangeiginyi,” manyija! Aawa. Kiraazitiyari limwadinya'na yida'maraangebwi kininnakeinyi. Yi Kiraazitiyari limwaga'manigevi Gotiyai “Yida'maraangeiginyi,” nyidadelyi. ¹⁰“Nimi Kiraazitiyari nebulya'na yawiranganima!” dadi mwaaiheinyi. “Yi ayina dikaavake diraginyavi yibwakidevaabi' diraginya savi yibwakinima! Gami daanga maarya saburi gamiji avaaina ye'mwannamaarima! Sai sara balakabaabi'na avaazimunya yawi'di niminyina myawi'nyadi balideinyi! ¹¹Sareinyi mwaaimujainyi Gotiyai bainikeraavi nimi kwainyiji ayina nyidikaavana!” jemwaaidi Kiraazitiyari nebulya'na diraginna yawirangamanigeinyi.

**Tiyawinna yi'masa'na kaanyave'na
gavamarasi'nyikaanya diraginna wodevwinesi.**

¹²Nimi dara majivanige. Kiraazitiyari nebulya'na mena yawirangamweinyi. Mena maa'mweinyi. Nimi mena wi'nanyira. Gotiyai mena naanga yune nebulya'nanyainyi nyimwaaihiwakeinyi. Sara majivanige. Sare kiri' Kiraazitiyai Jizaazai gaminyineinyi nyimaarakabaabi' sara yima'nya'neinyi maa'mujainyi kaanyave'na diraginna wivanigeinyi. ¹³Nya'mweihi, nimi sainyi myawirivanige. Nimi mena maa'mweinyi dingaka! Kiri' nimi simunya yune gave piri'nanyainyi “Yuya sinnawi kigaasa sangina nimi mena navika yadinyangi. Sara yadi dividaa'nya yuyabwi maarya'na yibwa'mwagayiwibwata yadinyainyi. ¹⁴Wijaaya'ne! maarya'neinyi daza' limwaderyawi tiyawinna kaanyave'na diraginna wivanigeinyi. Wijaaya'ne daza' yi dare'na. Naangeri nebulya'na yawiranganya'neinaavi Kiraazitiyai Jizaazarina nemi yilaawia'ne jaka Gotiyai nejiwaramaa'manikesi.”

¹⁵Sarevidaa'nyi nemire simunyabwi Gotiyarinebwi a'mwe nebulyaina yima'nivanigoina yagaala divanige daza'na sara yawiraana! Nabaai pwaihi simunya pi'bwai kininnakeihi mwaabizaihi yi Gotiyai nayaa yihiziwaanada simunya dazabwi kibwi yavada'gala yihyathelyi. ¹⁶Kiri' yuyaina simunya mena maa'manigovwi, saburi sasara nayaa yamaryaana!

¹⁷Nya'mweihi, sarimi nimire simunya saburi dinye'mwannanyimidinyila! Nabaai nemire saburi sara yamarivanigasara nemididivisaraavi nayaa baihana'divi' sabaabi' jila! ¹⁸Sare' darevidaa'nyinyira. Kwalaalyagaa' sara myamarivanigasaraavina mena yihitheinyi. Nabaai dahaakigaa' kale nyadaa'nyi kidalaala purata'di ayina yihithivanige. A'mwe kwalaalyara “Nemi Kiraazitiyareinera,” dadivisara kayaa'na yivanigasavi Kiraazitiyai yita yovihirarannikevi balakevine yagaalya' tihimanigasarera. Kiraazitiyarine yikamaangerera. ¹⁹Nemi Gotiyari yilaaya yadaanyabaabi' kunnya kilaakejikine sabwi “Naangengira,” dadivisarera. Kumire gotiyaibisangi. Sahwara yadivisangina kunnya yaya' makinadivisare. Kiri' sahinigina wagila wivwa'nivan! Yune Kwaakevakiya sabwina yawi'divisare. Sareraavi Gotiyai kayaaka yigaladerera. Kayaa'nanyaba mwaabi'dere. ²⁰Nimire simunya sabwi je'mwannanyimidinyide' darevidaa'nyinyi. Nemi Sigunyavi mwaalya'neinera. Nabaai sahibadaa'nyi yune nevadaihamaaraderina yilaaya'na yemwaaimanigoinera. Sahwai Naangei Jizaazai Kiraazitiyalyi. ²¹Sahwai nemire kilaaka nagaazazi' barya'neji' gamire kilaaka byaanna diraginya' kininnakeji' neyimavadelyi. Sai yuyaraaviji yuyangiji maremwalya'nei gaminyi kwaakewi yiniga wi'na wakade diraginya dazavi sasara yadelyi.

4 ¹Nimire nya'mweihi, sariminyina tewaanya nyivu'nadeihi, sariminyina nyima'nadeihi, sariminyina yilaaya naanga yadinyaihi, nimire kingimwaaihi'nya wavila'nikei maa'de'bisaihi, sarevidaa'nyi nimi diwebaaibi' Naangeri nayaa diraginna dithaayila! Sariminyina tewaanya nyivu'nadeihi diraginna dithaayila!

**Yilaayabwina avaaizimunya'na yadivi'
simunya tewaanyabwi maarya'nesi.**

²Yuwothiyaa'gi nayaa dinyu'nana! Sidikiya'gi nayaa dinyu'nana! Naangeri wilamwaaihilyavi avaaizimunyaabwina ayina jawirila! ³Yo, nabaai Sizihaazaigi nebulyaigi, githaangamanige. A'mwe dazawaari avaaizimunya'na mwaalya'newaari nayaa dihaimwana! Sahiriwaai yagaala tewaanyavina nimiji nyigaidaa'disawaalyi. Nabaai Kilemeniji nimire avaiwawinya pwaraji sawaalyi nye'mwannayadivisangi. Yi kuminyine yaya yuya Gotiyare bukuyavi mwaalikengi. Bukuya savi Gotiyai yuyara yuyagaa' yuyagaa'ne gaalyabwi kininnakeraavire yaya yida'nikengi. ⁴Naangeri wilamwaaahasavi yuyagaa' yilaaya jila! Nimi ayina divanige. Sarimi yilaaya naanga jila! ⁵Naangei nebawa mi'. Yarai bathevi sarimi a'mwe yuyaraayaba bwiwangebwi yadaapiya sareihiri sahvara nayaa yihyawirangabi'deihilyi. ⁶Aane pimili' kimili' yawita kwalaalya myawipinera! Aawa. Yuya sanna Gotiyari nayaa duzila! Yi yuyangina yihigainivanikenna Gotiyari jithaanganyila! Sara yadivi' sahwai yihu'nade'na "Su! Su!" duzila! ⁷Sareihiri Gotiyai kwaamu'nanyabwi nejaavadevwi nayaa yihimaremwaaladeihilyi. Yi Kiraazitiyai Jizaazari wilamwaaahasavi dazabwi sarimire simunyangiji sarimire yawisangiji nayaa yihimaremwaaladevulyi. Kwaamu'nanya dazabwi nemi yune'na yawiramaraanneburaavi wavila'nikebulyi.

⁸Nya'mweihi, yagaala piniji dide'nanyi. Sarimi siduta nayaa da'dare davwina jawiralimwagarila! Yuya nawi'nya nebulyabulyi, kuminyine yaya nemi yuneba makilya'ne sabulyi dazabura. Yi yuya sabura nebulyaburaji yuya simunya nawi'nya kininnakeburaji yuya yida'maraangeburaji yuya tewaanyabura girika maayaburaji yuya wivu'nadevuraji yuya "Sa tewaanaangengi," didivisaburaji ⁹sabura jawiralimwagarila! Yuya dazabwi nimi yihiziwakadaari yi sarimi mena maaresabulyi. Yi sarimi kadika nyu'nadivi' nimi sara yadaariyai tinnu nyanganeta yuya sabwi dazabwi yuyagaa' sarimi jiwila! Sarevidaa'nyi Gotiyai kwaamu'nanyabwi nejaavadei sariminyi yihye'mwannamwaaladelyi.

**Pilipaai mwaalyara Polimi gaimwange'na nigwia
yasaabesa'na yilaaya yakebwines.**

¹⁰Dahaa' niminyina ayina dihaa'bwata yadivi' mena nyawi'manigasaihilyi. Sare'na nimi Naangerina yilaaya naanga

yivanigeinyi. Nebulyasi. Kigaa' sarimi niminyina simunya kuna yawiresaihilyi. Kiri' kigaa' sarimi tuta maayaihi nyigaimwagya'neihilyi. ¹¹Nimi gilyivisanna nyigainivanika majivanige. Aawa. Sare' darevidaa'nyinyi. Nimi simunya dara mena maa'manige. Dala pibwina pibwinanyabwi kanyima'noji yi wi'nanyainyi. Yuya dazanna nimore simunya' tewaanya nyima'nadesi. ¹²Dara yawirangamwa. Nimi gilyivita maayainyi yiniga mwaaimuneinyi. Nabaai dara yawirangamwa. Gilyivita kwalaalya yiniga limwaga'di sara yiwineinyi. Gazazangiji yuya kiningiji yuya sanna yawi'nikeinyi. Yi munya nyideviji mijika nyideviji sawaarina “Wikira,” dadinyainyi. Yi gilyivita kwalaalya limwagasabwinaji gilyivita wigainya sabwinaji “Wikira,” dadinyainyi. ¹³Kiraazitiyai niminyi diraginya nyivaimwadere diraginyavi yuya kini sa yiniga wi'na yiwineinyi. ¹⁴Nyigainiwakenna yawita kwalaalya myivanige kiri' nimore taanginyaburi gaimwagya'neih nyemwannadivi' nawi'nya tewaanyabwi nyiwa'daasaihilyi.

¹⁵Pilipai mwaalyaihi, niminyina dara yawirangadiviki “Yagaala tewaanya' yihiziwaakaka nemire Piroviji Maazathoniya yagalya'mavakegaa' yune nemi saina wijaayabwine gaminyi ye'mwagakoinera. Kiraazitiyare kusilaanyangiya aane piba kibanyara sara myesare.” ¹⁶Nabaai sasareih niimi yihyagalya'mavena anga Tezalonaaika mwaaideryagaa' niminyi nimore nyigainake'na pigasaai maryasaabesaihilyi. ¹⁷Yanga wijaaya'na niimi jaka yihithadaarina mi'. Aawa. Nimi yawi'na “Sarevine tivikita sarimire tewaanya naangebwi naanga kuna yima'nana! Gotiyai tewaanya yihyade' tivikisasi,” dena yihithiwa. ¹⁸Dahaa' yuya kini maa'mwejiyainyi gilyivita kwalaalya limwaga'manigeinyi. Sare'na niimi mena yunebannanyi. Yi sarimire yange yasiwaabaasa Epapirothaaitazari mena maa'mwengi. Yanga nawi'nya daza Gotiyari dika wabatirinya kininnake' yiravayihu'divita dazabaabisangi. Yi nyijawa'daasa' Gotiyari wijawa'daa'. Gotiyari wijaaya'ne yiravadingi'divisabisangi. Yi dazahininna maa'da sahwari yilaaya naanga yigaidelyi. ¹⁹Nimore Gotiyai gilyivita yuya tewaanyanna tewaanyannanyangi aaya kaavilyalyi. Sarei gilyivita sarimire kilaakejikinengina yihigainivanikenna yanga yuya yunebanna yihyadelyi. Sare'na a'mwera “Gotiyai byaannakei,” dadivi' gaminyine yaya' makibi'delyi. Yi Kiraazitiyai Jizaazari wilamwaaahasavi sara yadelyi.

²⁰Gotiyai sai nemire Nenimaangerine yaya' yuyagaa' yuyagaa' munyaba makilaana! Nebula sahirisi.

Yagaala pininnesi.

²¹Kiraazitiyai Jizaazari wilamwaaahasara Gotiyare tewaanyaraavi “Nya'mweih!” niminyina duzila! Nimijiya nya'mwera “Neya'mweih!”

yihithivaniga'. ²²Gotiyare tewaanya pwara “Neya'mweihi!”
yihithivaniga'. Sahwarajiyara yunebanne maremwaalikei Sizaare
angeviyara diraginna yihithivaniga' “Neya'mweihi!” ²³Naanga
Jizaazai Kiraazitiyare gaimwangevine yange' sarimire kuryaraji
yihye'mwannamwaalana!

Poli